

南靖縣志

卷首至
第一卷

乾隆八年冬鑄

邑令姚斐園手

南靖縣志

江苏工业学院图书馆
藏 章

序

郡守牧令以知名官蓋必其所治
之土地人民因革利弊無一不洞
悉於胸而後舉而措之裕如也今
之因名考實者誰乎叩以目前之
務尚惘焉莫知而况乎山川疆域
之所自始戶口學校之所從來風

俗代有盛衰人物時有隆替更何
暇窮其原而溯其委哉南靖大尹
姚君閩賢宰也理長樂閩清諸邑
莫不奏刀耒然或曰其學博故其
治近古或曰其才長故其政有則
姚君皆遜讓不居曰我靡他官乎
此知乎此而已或問曰子何以知

之曰我稟命於上官周諮於寮案
訪諸紳士耆老徵諸本邑舊乘是
以廢可脩墜可舉偏可矯弊可救
否則長夜坐屋隅技將安施噫姚
君之言可謂得爲治之本矣故其
於長樂也下車卽輯其志未三月
而代者來是以不果其於閩清也

甫及半載編舊訂訛邑志燦然今
於靖志又致詳焉靖在元至治間
割龍溪漳浦龍巖以成邑初名南
勝繼改今名明萬曆時乃有志距
今百五十年相傳僅數十頁官斯
土者近百年槩不過問知縣之所
知安在而忽略至此壬戌秋九月

姚君始蒞靖廣爲搜討詳加校讎
越明年予奉



命觀察書成寄覽予嘉姚君不虛其
官不負其職之名也其於靖政之
小大必一知而無不知乎今之居
官者苟盡如是何患不家唐虞而
人三代耶若斯志之綱領條目并

井不紊文詞紀述灼灼有章此則
姚君之才之學爲之有不待予言
而顯者予欲汀漳龍巖之官悉如
姚君且不獨汀漳龍巖之官應如
姚君故欣然而樂爲之序

皆

乾隆九年歲次甲子春王月

欽命福建分巡巡海汀漳龍道按察使司副使王廷諍書



新輯南靖縣志序

昔朱子文公凡其宦跡所至首先脩明志乘蓋任其官則其地之形勢風土人文政事諸大端暨夫因革損益之故興廢治忽之由是非得失之機瞭然洞悉


於胸中夫而後可以次第見諸
施爲靡不曲當靖地自元至治
設縣以來書闕有間焉予甫蒞
靖卽欲做法朱子遺意彙成一
編俾得自爲考核且兼以俟來
者爰是謀諸學博李君嚴君與

邑之縉紳先生共勦盛事一時
羣相鼓舞廣爲搜羅集成若干
卷分彙若干授之梓人刻期竣
工始於癸亥之秋成於季冬其
間條分縷晰斟酌去取蓋亦幾
費辛力矣第以俗吏而秉筆削

言之無文非笑於後人者不少
顧明知之而不憚爲之者夫亦
竊比朱子之意不知其非笑之
爲非笑也又憶予前履任梅溪
作梅志志成友人毘陵沈鹿坪
寄予詩曰今時作宰讓明公硤

石謀猷先後同爲治正當清嶂
外放衙多在白雲中桑田夙駕
行春雨花縣鳴琴座晚風料只
一篇新志稿更無長物載筠籠
今靖志與梅志俱成則予所獲
不又多乎哉

乾隆八年季冬邑令姚循義書



南靖縣志凡例

一萬曆舊志寥寥數十頁且所紀大半係遷復故
城事不足徵信久矣茲照省郡志逐條摘出復
採錄遺書諮詢故老擇其可記者編輯成帙但
時移事遷興廢不一執筆者生乎其後既不能
目覩時事安保一二盡無遺誤然亦不敢妄加
臆說以滋後日摹稜

一舊志山川止臚名目今特綜其支幹分合脈絡
起訖使一邑形勢瞭然在目固非襲青囊家言

也

一 人物依年代爲序則韋布與縉紳交錯一善與碩德相比今照漳郡志分儒林循良孝義武功等項所分名目不過就中取其大者類而見之非謂儒林者必不能武功循良者必不能孝義也亦有其人旣不可以不傳而又無所專屬不得不依附以見觀者諒焉

一 賦役遵照乾隆七年司頒成式其從前舊則仍綴於後便窮源也